

explicantur sphæræ elementa , ex quibus deinde Chronologiæ & Kalendarii doctrina derivari solet . Hanc autem doctrinam gravissimis nonnullis Historiæ ecclesiasticae factis breviter interdum illustrabo ; has enim institutiones potissimum scribo *Ecclesiasticis viris & sacræ Theologiæ studiosis* . Omnis igitur nostræ Philosophiæ summa ad veritatem assequendam moresque informandos refertur atque dirigitur .

Porro hanc in singulis Philosophiæ partibus tractandis servabo rationem , ut quæ ad mentis facultates perficiendas , ac sacram Theologiam intelligendam , ad Religionem insinuandam tuendam atque propagandam conducere possunt , ea omnia diligenter inquiram & accurate pertractem ; quæ autem sunt exiguae utilitatis leviter perstringam , & denique vanas ac fuitiles quæstiones vel breviter referam , vel omnino omissam ; hæ enim ignorantia non nocent , vel faltem scientem non juvant magnopere ; imo plerumque miseram rixandi cavillandique libidinem ingerunt , *& multa nescire magna est pars scientiæ* . Et certe si virum quemlibet ingenuum altercationes pugnæque verborum dedecent , quanto magis *Ecclesiasticos viros* , quibus *gloriosius est scire bene vinci , quam culpabiliter vincere* . Hic tamen cavendum est , quod faciunt recentiores quidam superciliosi censores , ne tanquam inutiles omnino rejiciantur quæstiones nonnullæ , quæ tamen in Theologia sunt utilitatis maximæ . At non raro contingit quæstiones aliquas non satis clare exponi , & ex illa obscuritate nasci inanissimas *logomachias* ; id autem curabo diligenter ut nempe status quæstionis accurate explicetur , quo facto , litem totam evanescere statim manifestum fiet .

Tandem hanc legem religiose servabo , ut ve-